



4. Radunanza cumünela dals 28.6.2017 a las 20.00 in sela polivalenta S-chanf

Presidi: Gian Fadri Largiadèr

Actuar: Gian Andri Barblan

Preschaints: Preschaints sun 43 votantas e votants

Büro electorel: Maura Romerio Duschletta e Lilian Godly

Tractandas:

1. Protocol
2. Rendaquint 2016
3. GIS Engiadin’Ota, cunvegna da prestaziun
4. Vendita terrain tres persunas chi vivan a l’ester
5. Caratsch Andrea, dumanda cumplita terrain
6. Varia

La glista da tractandas vain appruveda sainza objecziuns.

Protocol: Il protocol da la radunanza cumünela dals 31 meg 2017 vain appruvo sainza cuntravuschs.

19 0.205 Rendaquint/planisaziun da finanzas Rendaquint 2016

Il president, scu responsabel da finanzas, fo ün’introducziun e surdo il pled a la contabla, duonna Mengia Maria Cuorad. Ella preschainta in detagl il quint curraint, il quint d’investiziuns e las cifras distintivas per l’an da gestiun 2016. Tar expensas totelas da fr. 10'495'042.65 ed entredgias da fr. 11'021'949.77 serra quel cun ün avaunt da fr. 526'907.12. Büdschetto d’eira ün suravaunz d’expensas d’arduond fr. 78'935.00. Las amortisaziuns ordinarias s’amuntan sün totel fr. 654'220.30. Per fr. 2'120'467.15 sun gnidas fattas amortisaziuns extraordinarias. Tal quint d’investiziun importan las sortidas fr. 1'994'776.23. Las entredgias dal quint d’investiziuns importan fr. 581'516.75, uschè cha la vschinauncha ho gieu da finanzcher investiziuns nettas d’arduond fr. 1'413'259.48. Il Cash Flow importa fr. 3'307'451.00 ed es bainquaunt meglider scu previs. Zieva cha davart da la contabla sun gnidas dedas tuottas spiegaziuns approuva la radunanza cumünela unanim il rendaquint 2016.

**20 0.210 Annunzchas da fabrica
GIS Engiadin’Ota, cunvegna da prestaziun**

Cun que chi vain abolieu la fin da l'an 2017 il circul d'Engiadin’Ota es gnida stipuleda üna nouva cunvegna da prestaziun traunter la societed d'indschegners GIS Engiadin’Ota e las vschinaunchas. Cun tela cunvegna dess gnir garantieu la collavuraziun e'l svilup dal sistem d'infurmaziun geografic per l'Engiadin’Ota. La radunanza cumünela decida d'appruver la cunvegna da prestaziun sainza cuntravuschs.

**21 0.110 Legislativa
Vendita terrain tres persunas chi vivan a l'ester**

Da l'an 1981 ho la radunanza cumünela fixo la quota per vendita d'immobiglias a persunas chi vivan a l'ester sün 0%. Al principi da l'an es entreda üna dumanda da cumprita d'üna chesa tres üna persuna chi viva a l'ester. La vschinauncha ho fat sclarimaints cul inspectur dal register fundiari e cun otras vschinaunchas chi haun d'incuort uzo la quota. L'inspectur dal register fundiari ho musso sü differentas variantas chi sun eir gnidas preschantedas a la radunanza. La suprastanza ho proponieu a la radunanza d'aderir a la cumprita d'immobiglias tres persunas chi vivan a l'ester sainza restricziuns i'l rams da la ledscha superiura. Zieva animeda discussiun ed üna cuntraproposta dad uzer bainschi la quota, però sün 25% impè da sün 100% ho vuscho la radunanza cumünela cun 16 cunter 15 vuschs, per la varianta da la suprastanza cumünela. Tar la votaziun finela ho decis la radunanza cun 24 cunter 12 vuschs dad uzer la quota per vendita d'immobiglias a persunas chi vivan a l'ester sün 100%.

**22 9.998 Cumprita e vendita terrain cumünel
Caratsch Andrea, dumanda cumprita terrain**

Andrea Caratsch da Schlarigna ho fat la dumanda a la vschinauncha da S-chanf per cumprer terrain. Sar Andrea es in posses da las parcellas nr. 32 e nr. 33 in Somvih e vuless restabilir ils üerts da las parcellas nr. 32 e nr. 33, i'l stedi historic. Our da quist motiv ho'l inoltro la dumanda da cumprer arduond $30m^2$ terrain da la parcella nr. 36 in Somvih, chi's rechatta in posses da la vschinauncha. Impü ho sar Andrea eir fat la dumanda, d'abolir il dret da passagi tres la parcella nr. 32. La radunanza cumünela decida zieva cuorta discussiun da na vender il terrain in questiun e da na aderir a la dumanda da pudair stricher aint il cudesch fundiari il dret da passagi.

23 9.999 Varia

Il president infurmescha, cha'l proget da pilot da parker vain prolungieu fin la fin da l'an. Quist our dal motiv, chi vain fat ün'analisa a regard ils parkegis. Il resultat vain preschanto a la radunanza pü tard.

Impü renda el attent cha'l proget da rait da fibra es sün buna via e cha la populaziun vain infurmeda a sieu temp sur da detagls a regard las spüertas, l'attach a la rait etc.

Il president spiega, cha zieva chi sun gnieus inoltros progets per la halla Bos-chetta Plauna as ho constato, cha'l cuosts surpassan quels chi sun gnieus büdschettos i'l preventiv. El renda attent, cha quist affer, cu eir l'avegnir da la deponia Bos-chetta Plauna vegnan discuss illas radunanzas cumünelas dals 23 avuost e dals 4 october 2017.

Impü vain rendieu attent, cha'l bancomat da la Raiffeisen tar l'administraziun es our d'funcziun e chi po però gnir retrat raps tal Volg, düraunt las uras d'avertüra. Tenor infurmaziuns da la mnedra da la filiela es fixeda la limita tar fr. 500.00 pro persuna e di.

Scu ultim renda el attent, chi ho lö ils 1. lügl 2017 la festa da luotta BüGla our illa Flab a S-chanf.

Our dal rauogl vain rendieu attent sül nouv lö dal crap da Theobald. Impü vain eir fat la remarcha cha la senda chi maina da Flin giò vers Cinuos-chel es in ün fich nosch stedi. Il president serra la radunanza a las 21.15 ed ingrazcha a tuot ils preschaints per lur cumparsa.

In buna fè

Il president:

G. Largiadèr

L'actuar:

G. A. Barblan